




Broj: 01-02-1-2286/23

Sarajevo: 22. 1. 2024.



ZASTUPNIKU
U ZASTUPNIČKOM DOMU
PARLAMENTARNE SKUPŠTINE
BOSNE I HERCEGOVINE

**Predmet: Prijedlog zakona o Vrhovnom sudu Bosne i Hercegovine, predlagatelj:
zastupnik Denis Zvizdić, dostavlja se**

Poštovani,

Sukladno Odluci Kolegija Zastupničkog doma Parlamentarne skupštine Bosne i Hercegovine u privitku vam dostavljam Prijedlog zakona o Vrhovnom sudu Bosne i Hercegovine, čiji je predlagatelj zastupnik Denis Zvizdić, broj: 01-02-1-2286/23 od 1. 11. 2023., koji je Odjel za lektoriranje Tajništva Parlamentarne skupštine BiH lektorirao na bosanski, hrvatski i srpski jezik.

S poštovanjem,



Privitak:

- Prijedlog zakona

Dostavljeno:

- naslovu
- a/a



PRIJEDLOG

Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine, na __. sjednici Predstavničkog doma, održanoj __. __. 2023. godine i na __. sjednici Doma naroda, održanoj __. __. 2023. godine, usvojila je

**ZAKON
O VRHOVNOM SUDU BOSNE I HERCEGOVINE**

DIO PRVI – OPĆE ODREDBE

**Član 1.
(Predmet)**

Ovim zakonom uređuju se: organizacija, nadležnost, javnost rada, finansiranje i sva druga pitanja u vezi sa osnivanjem i funkcioniranjem Vrhovnog suda Bosne i Hercegovine (u daljnjem tekstu: Vrhovni sud) kao najvišeg kasacionog suda u Bosni i Hercegovini, koji osigurava dosljedno tumačenje prava na teritoriji cijele Bosne i Hercegovine.

**Član 2.
(Rodna ravnopravnost)**

Izrazi koji su u ovom zakonu, radi preglednosti, dati u jednom gramatičkom rodu, bez diskriminacije se odnose i na muškarce i na žene.

**Član 3.
(Nezavisnost)**

Vrhovni sud je u vršenju sudske funkcije samostalan i nezavisan i sudi na osnovu Ustava Bosne i Hercegovine, zakona i drugih propisa Bosne i Hercegovine.

**Član 4.
(Sjedište)**

(1) Sjedište Vrhovnog suda je u Sarajevu.

(2) Na zgradi u kojoj je smješten Vrhovni sud moraju biti istaknuti naziv suda, grb i zastava Bosne i Hercegovine.

**Član 5.
(Pečat)**

Vrhovni sud ima svoj pečat u skladu sa Zakonom o pečatu institucija Bosne i Hercegovine.

Član 6.
(Sudska toga i službene legitimacije)

- (1) Sudije u toku suđenja i prilikom javnog objavljivanja odluka nose togu.
- (2) Sudijama se izdaju službene legitimacije.
- (3) Visoko sudsko i tužilačko vijeće Bosne i Hercegovine (u daljnjem tekstu: VSTV) propisuje obrasce i izgled službene legitimacije, te korištenje i izgled sudske toge.

DIO DRUGI – OSNOVNI PRINCIPI

Član 7.
(Obavezna primjena odluka)

Odluke Vrhovnog suda su konačne i obavezujuće.

Član 8.
(Način izbora sudija)

- (1) Sudije Vrhovnog suda imenuje VSTV, vodeći računa o tome da sastav sudija, u pravilu, odražava sastav naroda i građana Bosne i Hercegovine.
- (2) Stručni saradnici, službenici i administrativno-tehničko osoblje u Vrhovnom sudu zapošljavaju se u skladu s propisima Bosne i Hercegovine kojima se reguliraju radni odnosi.

Član 9.
(Način rada)

- (1) U Vrhovnom sudu u suđenju učestvuju sudije.
- (2) U Vrhovnom sudu sudi vijeće od troje sudija, osim ako posebnim zakonom nije drugačije propisano.

Član 10.
(Imunitet)

- (1) Sudije imaju imunitet u skladu s ovim zakonom.
- (2) Sudija ne može biti pozvan na odgovornost za izraženo mišljenje ili glasanje prilikom donošenja sudske odluke, osim ako se radi o kršenju zakona od strane sudije koje je krivično djelo.
- (3) Sudija ne može u postupku pokrenutom zbog krivičnog djela učinjenog u obavljanju sudijske dužnosti biti pritvoren niti mu može biti određen pritvor bez odobrenja VSTV-a.
- (4) Za krivična djela za koja se postupak pokreće po privatnoj tužbi, prijedlogu ili se radi o preuzimanju krivičnog gonjenja od strane oštećenog, krivični postupak protiv sudije ne može se pokrenuti niti voditi bez odobrenja VSTV-a.

Član 11.
(Javnost rada)

- (1) Rad Vrhovnog suda je javan.
- (2) Javnost rada osigurava se objavljivanjem sastava sudskih vijeća, javnošću sudskog postupka pred Vrhovnim sudom, javnim objavljivanjem odluka Vrhovnog suda i omogućavanjem javnosti da se putem službene internetske stranice ili sredstava javnog informiranja upozna s radom Vrhovnog suda.

Član 12.
(Službeni jezici i pismo)

- (1) U Vrhovnom sudu su u upotrebi bosanski, srpski i hrvatski jezik, te latinično i ćirilično pismo.
- (2) Sudovi vode postupak i donose odluke na jeziku i pismu kojim se služi predsjednik vijeća.

Član 13.
(Izvještavanje)

- (1) Vrhovni sud najmanje jednom godišnje obavještava Parlamentarnu skupštinu Bosne i Hercegovine o primjenjivanju zakona i drugih propisa Bosne i Hercegovine o potrebi donošenja, mijenjanja i dopuni tih propisa, kao i o drugim pitanjima koja se odnose na primjenu zakona i drugih propisa Bosne i Hercegovine.
- (2) Izvještaj iz stava (1) ovog člana ne usvaja Parlamentarna skupština Bosne i Hercegovine, već joj se dostavlja radi upoznavanja.

Član 14.
(Saradnja i pravna pomoć)

- (1) Svi sudovi u Bosni i Hercegovini saradivati će međusobno i u predmetima iz svoje nadležnosti će pružati pravnu pomoć i dostavljati sve relevantne informacije iz sudske prakse Vrhovnom sudu kada se to zatraži posredstvom predsjednika Vrhovnog suda.
- (2) Sve institucije, organizacije, organi i tijela vlasti i pravna lica koji vrše javna ovlaštenja, dužni su Vrhovnom sudu dostaviti tražene spise, isprave i druge podatke, potrebne za vođenje postupka pred Vrhovnim sudom.

DIO TREĆI – NADLEŽNOST

Član 15.
(Nadležnost Vrhovnog suda)

- (1) Vrhovni sud odlučuje o redovnim pravnim lijekovima protiv odluka sudova na nivou Bosne i Hercegovine ako je to zakonom propisano.
- (2) Vrhovni sud odlučuje o vanrednom pravnom lijeku izjavljenom na pravosnažnu odluku sudova u Bosni i Hercegovini i u drugim stvarima određenim zakonom.

- (3) Vrhovni sud odlučuje o sukobu nadležnosti između sudova u Bosni i Hercegovini.
- (4) Vrhovni sud odlučuje o pravnim lijekovima protiv odluka svojih vijeća ako zakonom nije drugačije propisano.
- (5) Predsjednik Vrhovnog suda će najmanje dva puta godišnje održavati zajedničke kolegije s predsjednicima Apelacionog odjeljenja Suda Bosne i Hercegovine, Vrhovnog suda Federacije Bosne i Hercegovine, Vrhovnog Suda Republike Srpske i Apelacionog suda Brčko Distrikta Bosne i Hercegovine na kojim se razmatraju aktuelna pitanja iz sudske prakse. Predsjednik Vrhovnog suda može sazvati kolegij na kojem će se razmatrati nacrti zakona ili drugih propisa važnih za rad sudova.
- (6) Vrhovni sud obavlja druge poslove utvrđene ovim zakonom osim onih iz nadležnosti Ustavnog suda Bosne i Hercegovine.

DIO ČETVRTI – UNUTRAŠNJA ORGANIZACIJA VRHOVNOG SUDA

Član 16. (Predsjednik Vrhovnog suda)

- (1) Predsjednik Vrhovnog suda obavlja sljedeće poslove i zadatke:
- a) predstavlja sud i rukovodi sudom;
 - b) imenuje sudije u različita odjeljenja i vijeća u skladu s Poslovnikom;
 - c) zakazuje i vodi Opću sjednicu Vrhovnog suda;
 - d) izrađuje i izvršava budžet Vrhovnog suda;
 - e) organizira rad suda i rukovodi osobljem Vrhovnog suda;
 - f) obavlja i druge poslove neophodne za funkcioniranje Vrhovnog suda.
- (2) Predsjednika Vrhovnog suda imenuje VSTV između sudija imenovanih u Vrhovni sud, a on mora imati dokazane rukovodne i organizacione sposobnosti neophodne za rad suda.

Član 17. (Sekretarijat Vrhovnog suda)

- (1) Vrhovni sud ima Sekretarijat.
- (2) Sekretarijat pomaže predsjedniku Vrhovnog suda u sudskoj upravi, obavlja administrativne poslove i obavlja druge poslove koje mu dodijeli predsjednik Vrhovnog suda.
- (3) Sekretarijatom rukovodi sekretar kojeg, na prijedlog predsjednika Vrhovnog suda, postavlja Opća sjednica.

(4) Sekretar Vrhovnog suda treba biti diplomirani pravnik VII. stepena, odnosno 240 ECTS bodova po bolonjskom ciklusu studiranja, s položenim pravosudnim ispitom, koji ima najmanje pet godina radnog iskustva u struci.

Član 18.
(Ured registrara)

(1) Ured registrara je organizaciona jedinica Vrhovnog suda nadležna za pružanje pravne i stručne podrške sudijama na predmetima iz nadležnosti tog suda.

(2) Registrara Vrhovnog suda, na prijedlog predsjednika, postavlja Opća sjednica.

(3) Registrar Vrhovnog suda treba biti diplomirani pravnik VII. stepena, odnosno 240 ECTS bodova po bolonjskom ciklusu studiranja, s položenim pravosudnim ispitom, koji ima najmanje sedam godina radnog iskustva u struci.

Član 19.
(Opća sjednica)

(1) Opća sjednica razmatra primjenu zakona i drugih propisa i rad sudova, te ostala pitanja koja članovi vijeća odluče delegirati na Opću sjednicu.

(2) Opću sjednicu Vrhovnog suda čine predsjednik i sudije Vrhovnog suda.

(3) Opću sjednicu saziva i njome predsjedava predsjednik Vrhovnog suda, na ličnu inicijativu ili na zahtjev najmanje jedne trećine svih sudija Vrhovnog suda.

(4) Za rad i odlučivanje Opće sjednice potrebno je učešće većine sudija od ukupnog broja sudija Vrhovnog suda.

(5) Odluke se donose većinom glasova prisutnih sudija.

(6) Opća sjednica donosi mišljenje o nacrtu zakona ili drugog propisa kojim se uređuju pitanja značajna za rad sudova ili obavljanje sudske vlasti.

(7) Opća sjednica utvrđuje uputstva sudovima za praćenje sudske prakse.

(8) Opća sjednica obavlja i druge poslove propisane zakonom i Poslovnikom Suda.

Član 20.
(Odjeljenja)

(1) Poslovi i zadaci iz nadležnosti Vrhovnog suda obavljaju se u okviru odjeljenja.

(2) Odjeljenja i raspored zaposlenih po odjeljenjima određuje se Pravilnikom o unutrašnjoj organizaciji i sistematizaciji radnih mjesta Vrhovnog suda koji donosi Opća sjednica, uz saglasnost VSTV-a.

Član 21.
(Poslovník o radu)

- (1) Opća sjednica Vrhovnog suda, uz saglasnost VSTV-a, usvaja Poslovník kojim se reguliraju pravila funkcioniranja Vrhovnog suda i sva pitanja koja nisu izričito propisana ovim zakonom.
- (2) Poslovník o radu objavljuje se u "Službenom glasniku BiH".

Član 22.
(Ocjenjivanje)

Rezultate rada registrara, generalnog sekretara i zaposlenih u svakom odjeljenju ocjenjuje predsjednik Vrhovnog suda.

Član 23.
(Pripravnici i volonteri)

- (1) Vrhovni sud može zapošljavati na određeno vrijeme pripravnike i volontere, radi sticanja radnog iskustva neophodnog za polaganje pravosudnog ispita.
- (2) Broj pripravnika i uslovi za zapošljavanje pripravnika i volontera na određeno vrijeme reguliraju se Pravilnikom o unutrašnjoj organizaciji i sistematizaciji radnih mjesta.

Član 24.
(Ministarstvo pravde Bosne i Hercegovine)

Vrhovni sud će u ostvarivanju poslova sudske uprave saradivati s Ministarstvom pravde Bosne i Hercegovine, posebno u dijelu koji se odnosi na razmjenu informacija i drugih statističkih podataka, uz potpuno osiguranje nezavisnosti Vrhovnog suda.

DIO PETI – FINANSIRANJE VRHOVNOG SUDA

Član 25.
(Plaće)

- (1) Plaće i naknade registrara, generalnog sekretara i stručnog sudskog osoblja utvrđena su Zakonom o plaćama i drugim naknadama u sudskim i tužilačkim institucijama na nivou Bosne i Hercegovine.
- (2) Plaće i naknade administrativnog i pomoćnog osoblja utvrđene su Zakonom o plaćama i naknadama u institucijama Bosne i Hercegovine.

Član 26.
(Budžet)

- (1) Vrhovni sud ima svoj budžet, koji je sastavni dio budžeta institucija Bosne i Hercegovine.
- (2) Prije početka svake budžetske godine, predsjednik Vrhovnog suda VSTV-u, uz pomoć generalnog sekretara, podnosi prijedlog budžeta.

(3) Na kraju svake budžetske godine predsjednik Vrhovnog suda podnosi izvještaj Parlamentarnoj skupštini Bosne i Hercegovine o izvršavanju budžeta Suda.

DIO ŠESTI – PRIJELAZNE ODREDBE

Član 27.

(Osiguravanje uslova za početak rada Vrhovnog suda)

(1) Ministarstvo finansija i trezora Bosne i Hercegovine će, u saradnji s Ministarstvom pravde Bosne i Hercegovine, u roku od šest mjeseci od dana stupanja na snagu ovog zakona osigurati sve potrebne materijalno-finansijske uslove za početak rada Vrhovnog suda.

(2) Nakon što se ispune materijalno-finansijski uslovi i kadrovska popunjenost za početak rada Vrhovnog suda, VSTV će donijeti odluku o početku rada Vrhovnog suda.

Član 28.

(Izbor sudija Vrhovnog suda)

(1) VSTV će u roku od tri mjeseca od dana stupanja na snagu ovog zakona donijeti odluku o potrebnom broju sudija u Vrhovnom sudu.

(2) VSTV će u roku od tri mjeseca od dana donošenja odluke o potrebnom broju sudija provesti proceduru izbora i imenovanja sudija u Vrhovnom sudu.

(3) Izbor sudija iz stava (2) ovog člana vrši se po konkursnoj proceduri propisanoj Zakonom o Visokom sudskom i tužilačkom vijeću Bosne i Hercegovine.

DIO SEDMI – ZAVRŠNE ODREDBE

Član 29.

(Zakonski i podzakonski akti)

(1) Ministarstvo pravde Bosne i Hercegovine će u roku od tri mjeseca od dana stupanja na snagu ovog zakona pripremiti prijedlog usklađivanja odredbi Zakona o sudu Bosne i Hercegovine, Zakona o Visokom sudskom i tužilačkom vijeću Bosne i Hercegovine i Zakona o plaćama i drugim naknadama u sudskim i tužilačkim institucijama na nivou Bosne i Hercegovine s odredbama ovog posebnog zakona.

(2) Podzakonske akte potrebne za provođenje ovog zakona nadležni organi iz stava (1) ovog člana će donijeti i uskladiti u skladu s rokovima i obavezama predviđenim ovim zakonom.

Član 30.
(Stupanje na snagu)

Ovaj zakon stupa na snagu osmog dana od dana objavljivanja u "Službenom glasniku BiH".

Broj: __. __. 2023. godine
Sarajevo

Predsjedavajući
Predstavničkog doma
Parlamentarne skupštine BiH

Predsjedavajući
Doma naroda
Parlamentarne skupštine BiH

OBRAZLOŽENJE

I. USTAVNI OSNOV ZA USVAJANJE ZAKONA

Ustavni osnov za donošenje ovog zakona sadržan je u odredbi člana IV. 4. a) Ustava Bosne i Hercegovine prema kojem je Parlamentarna skupština BiH nadležna za "donošenje zakona koji su potrebni za provođenje odluka Predsjedništva ili za vršenje funkcija Skupštine po ovom Ustavu".

II. RAZLOZI ZA DONOŠENJE ZAKONA

Zahtjev Bosne i Hercegovine za članstvo u Evropskoj uniji podnesen je u februaru 2016. godine. Evropska komisija usvojila je 29. maja 2019. Mišljenje o zahtjevu BiH za članstvo u EU u kojem je navedeno da je BiH odgovorila na 3242 pitanja iz Upitnika, te na 655 dodatnih pitanja. S tim u vezi, Evropska komisija je utvrdila 14 prioriteta koje Bosna i Hercegovina treba ispuniti prije otvaranja pregovora za pristupanje Bosne i Hercegovine Evropskoj uniji. Prioritet broj 4. tačka e) zahtijeva da Bosna i Hercegovina: „*Garantuje institucionalnu pravnu sigurnost svim građanima na teritoriji cijele države, na način da se uspostavi pravosudno tijelo kojem bi bilo povjereno da osigura dosljedno tumačenje prava u cijeloj Bosni i Hercegovini*“. To u suštini znači da Evropska unija traži od Bosne i Hercegovine uspostavu Vrhovnog suda s jurisdikcijom za teritoriju cijele Bosne i Hercegovine. Nema nijednog opravdanog razloga da se ovo važno pitanje za pravnu sigurnost i vladavinu prava u Bosni i Hercegovini ne regulira donošenjem posebnog *lex specialis* zakona s obzirom na to da sada u Bosni i Hercegovini imamo neujednačenu sudsku praksu i različito postupanje sudova u istim ili sličnim situacijama.

Nadalje, Parlamentarna skupština Vijeća Evrope je 2007. godine donijela Rezoluciju 1564 o krivičnom gonjenju za djela iz nadležnosti Međunarodnog krivičnog suda za bivšu Jugoslaviju i pozvala vlasti u BiH da: „*Obezbijede harmonizaciju sudske prakse, razmotre uspostavljanje vrhovnog suda na državnom nivou ili djau ovlaštenja vrhovnog suda postojećem sudu tako da obezbijede pravnu sigurnost*“. Time je još jednom nedvosmisleno pokazano da eventualno osnivanje Vrhovnog suda BiH jeste mehanizam za ujednačavanje različite sudske prakse u BiH.

U Državnoj strategiji za razvoj sektora pravde koju je 2008. godine usvojilo Vijeće ministara BiH navedeno je da: „*Nejedinstveno tumačenje zakona predstavlja prijetnju za jednakost građana. U ovom trenutku BiH ne posjeduje instrumente koji osiguravaju usklađeno tumačenje zakona. Od Vrhovnog suda se očekuje da ispunjava dinamičnu ulogu tumačenja zakona, kao i da se pobrine da svi sudovi jednako primjenjuju zakon, obezbjeđujući na taj način homogenost u sudskoj praksi u cijeloj BiH. Kao zaštitnik vladavine prava, vrhovni sud bi doprinio održavanju materijalne pravne sigurnosti i zaštiti osnovnih prava i sloboda*“. Dakle, ovdje je faktički Vijeće ministara BiH još 2008. godine prepoznalo problem u smislu neusklađenosti sudske prakse u cijeloj BiH, te je u najvažnijem pravosudnom strateškom dokumentu iskazana potreba postojanja Vrhovnog suda BiH.

OSCE je u svom izvještaju o petogodišnjem procesuiranju predmeta ratnih zločina u BiH pod nazivom „*Postizanje pravde u BiH*“, u maju 2011. godine donio preporuku kojom: „*Poziva predstavnike izvršne i zakonodavne vlasti da ozbiljno razmotre uspostavu vrhovnog suda BiH, kao suda zadnje instance, s ciljem osiguranja usklađenost tumačenja i primjene zakona, i jednakosti građana pred zakonom*“.

Dakle, u državi u kojoj paralelno postoje četiri pravna sistema i četiri krivična zakona uspostavljanje jednog vrhovnog suda na nivou države je jedini način da se kroz ujednačavanje sudske prakse stvori jedinstven pravni prostor. Neprihvatljiv je stav da se jednakost građana obezbjeđuje na nivou entiteta. Ustav BiH garantira svim građanima jednakost pred zakonom, i to je garancija koju mora ispoštovati država Bosna i Hercegovina, a ne entiteti, kantoni ili Brčko Distrikt BiH. Pitanje jednake interpretacije zakona nije značajno samo sa aspekta ostvarenja individualnih ljudskih prava i sloboda, već i sa aspekta pravne sigurnosti i predvidivosti u poslovnim i finansijskim odnosima i kao takvo, ovo je pitanje od presudnog značaja za sveukupan prosperitet zemlje.

Također, sa aspekta razloga za uspostavu Vrhovnog suda BiH, treba razlikovati apelacionu nadležnost drugostepenog odjeljenja Suda Bosne i Hercegovine i Ustavnog suda BiH i kasacionu nadležnost vrhovnog suda. Na taj način bi se jasno odvojila specifična uloga drugostepenog odjeljenja Suda BiH i Ustavnog suda BiH od specifične uloge Vrhovnog suda BiH koja se odnosi na područje kontrole zakonitosti, primjenu prava i zauzimanje opštih pravnih stavova.¹ Osnivanjem Vrhovnog suda BiH završila bi se piramida pravosuđa u Bosni i Hercegovini, jer je poznato da sve države regiona, a i najveći dio država EU imaju poseban vrhovni sud kao trećestepeni organ koji se bavi ujednačavanjem sudske prakse i zaštitom pravne sigurnosti svih građana.

III. RAZLOG ZA HITNI POSTUPAK

Riječ je o Prijedlogu zakona koji ispunjava jedan od dva alternativna uslova iz člana 133. Poslovnika, a to je da ima visok stepen hitnosti, s obzirom na to da se radi o jednom od 14 prioriteta iz Mišljenja Evropske komisije o zahtjevu BiH za članstvo u Evropskoj uniji, a što bi omogućilo u narednom periodu i otvaranje prvog klastera pregovaračkih poglavlja za članstvo u EU.

IV. PRINCIPI NA KOJIMA JE ZASNOVAN PRIJEDLOG ZAKONA

Ovaj prijedlog zakona zasnovan je na principima: ustavnosti, pravne sigurnosti i na principu prava na jednakost građana pred zakonom.

Od člana 1. do člana 6. regulirane su opće odredbe ovog zakona, koje obuhvataju predmet, rodnu ravnopravnost, nezavisnost, sjedište, pečat i sudsku togu i službenu legitimaciju.

Od člana 7. do člana 14. regulirani su osnovni principi ovog zakona i to obaveznost primjene odluka, način izbora sudija što vrši VSTV, zatim način rada, imunitet, javnost rada, službeni jezici i pismo, izvještavanje, te saradnja i pravna pomoć.

U članu 15. propisan je najvažniji dio zakona koji se odnosi na nadležnosti. Navedene nadležnosti propisane su u skladu s praksom rada vrhovnih sudova u regionu i zemljama Evropske unije. To se odnosi na apelacionu nadležnost, ali samo ako je to propisano posebnim zakonom, te na kasacionu nadležnost u svim slučajevima. To je ono što pravi razliku između Vrhovnog suda BiH i drugih apelacionih sudova u BiH. Pored toga, Vrhovni sud bi se bavio rješavanjem sukoba nadležnosti između sudova u BiH, te o pravnim

¹ Vidjeti pod: Stručno savjetovanje: „Trebali li BiH jedan vrhovni sud“, 29. septembar 2011, Fondacija Centar za javno pravo.

lijekovima protiv odluka svojih vijeća. I konačno, jedna od najvažnijih nadležnosti Vrhovnog suda, a što je Evropska komisija navela i u svom mišljenju kao jedan od prioriteta je ujednačavanje sudske prakse na teritoriji cijele države, i to je riješeno tako da predsjednik Vrhovnog suda najmanje dva puta godišnje saziva zajedničke kolegije s predsjednicima Apelacionog odjeljenja Suda BiH, Vrhovnog suda FBiH, Vrhovnog suda RS i Apelacionog suda Brčko Distrikta BiH. Na ovaj način bi dobili konačni pravni autoritet za ujednačavanje sudske prakse i pravnu sigurnost na teritoriji cijele BiH i mišljenja smo da je ovo najbolje rješenje od svih do sada predloženih modela za to.

Od člana 16. do člana 24. reguliraju se administrativno-tehnička i procesna pitanja koja se odnose na unutrašnju organizaciju suda. To su nadležnosti predsjednika Vrhovnog suda, nadležnosti Sekretarijata Vrhovnog suda, Ured registrara, rad Opće sjednice, način rada odjeljenja, donošenje Poslovnika o radu, ocjenjivanje, te saradnja s Ministarstvom pravde BiH.

U čl. 25. i 26. propisano je finansiranje Vrhovnog suda, i to vezanjem za poseban Zakon o plaćama i drugim naknadama u sudskim i tužilačkim institucijama na nivou BiH koji već postoji i primjenjuje se. Također, Vrhovni sud BiH bio bi budžetska institucija Bosne i Hercegovine i u saradnji s VSTV-om bi se svake godine određivao iznos koji je neophodan za finansiranje rada Vrhovnog suda.

U čl. 27, 28. i 29. reguliraju se prijelazne i završne odredbe koje se odnose na obezbjeđenja uslova za početak rada Vrhovnog suda, način izbora Vrhovnog suda, te svi zakonski i podzakonski akti koji se moraju donijeti ili izmijeniti da bi Vrhovni sud BiH mogao početi raditi u punom kapacitetu.

U članu 30. precizirano je da Zakon stupa na snagu osmog dana od dana objavljivanja u „Službenom glasniku BiH“.

V. PROCJENA FINANSIJSKIH SREDSTAVA ZA PROVOĐENJE ZAKONA

Za provođenje ovog zakona potrebno je osigurati finansijska sredstva u Budžetu institucija BiH i međunarodnih obaveza BiH za 2024. godinu. U članu 27. Prijedloga zakona predviđeno je da će Ministarstvo finansija i trezora BiH, u saradnji s Ministarstvom pravde BiH, u roku od šest mjeseci od dana stupanja na snagu ovog zakona osigurati sve potrebne materijalno-finansijske uslove za početak rada Vrhovnog suda. S obzirom na to da se radi o uspostavi nove pravosudne institucije na nivou Bosne i Hercegovine koja će imati odvojen budžet i odvojeno sjedište od Suda BiH i VSTV-a, procjenu iznosa finansijskih sredstva koja će biti neophodna za uspostavu Vrhovnog suda BiH izradit će resorna ministarstva u Vijeću ministara BiH, a na bazi procjene broja potrebnih sudija, saradnika i administrativno-tehničkog osoblja koju će uraditi VSTV, a što će obuhvatiti troškove za bruto plaće i naknade za sudije i ostalo osoblje, nabavku materijala i usluga, te uspostavu i opremanje sjedišta Suda.